

# Statuts dall'Uniun da dunnas Laax

---

## Num, sedia ed intent dall'uniun

### Art. 1 Num e sedia

Sut il num Uniun da dunnas Laax exista tenor igl art. 60 dil Cudisch civil svizzer in'uniun cun sedia a Laax. L'uniun ei commembra dall'Uniun catolica da dunnas dil Grischun (contribuziun annuala) ed aschia era commembra dall'Uniun svizra dallas dunnas catolicas.

### Art. 2 Intent ed incumbensas

L'Uniun da dunnas Laax ei in'uniun aviarta per dunnas da mintga vegliadetgna e da mintga nazionalitad.

Ella ademplescha incumbensas d'utilitad publica che surveschan en emprema lingia al beinesser dalla populaziun locala.

Ella promova activitads e purschidas che pertuccan ils interess dallas dunnas e da famiglias. L'uniun ademplescha las incumbensas independentamein ni en collaboraziun cun outras organisaziuns. L'uniun ei neutrala quei che concerna la politica da partida.

### Art. 3 Commembras, dretgs ed obligaziuns

Tut las dunnas che habiteschan a Laax e che pagan la contribuziun annuala san daventar commembras.

- a) L'entrada ufficala vala naven dalla radunonza generala.
- b) Mintga nova commembra survegn ils statuts.
- c) Tenor conclus alla radunonza generala dils 5 da november 2023, vegn il commembradi d'honor annulaus. Commembras che han survegniu entochen la fin digl onn 2023 il commembradi d'honor salvan lez era vinavon. Ellas restan deliberadas dalla contribuziun annuala.
- d) Mintga commembra ha ils suandonts dretgs:  
dretg da far propostas – dretg da votar – dretg da vegnir eligida – dretg da participar a tut las occurrenzas organisadas dall'uniun.
- e) Commembras passivas sustegnan l'uniun cun ina contribuziun annuala. Ellas han negin dretg da votar e da vegnir eligidas e san buca participar allas occurrenzas purschidas. Sche la contribuziun vegn buca pagada suenter in onn, scada il commembradi.
- f) Per mintga commembra defuncta vegn detg in rusari.
- g) **Extradas ston vegnir comunicadas alla presidenta en scret per e-mail ni per posta.**
- h) Il commembradi scada, sche la contribuziun annuala ei buca vegnida pagada durant in onn. Cheutras scadan tut ils dretgs e tut ils avantatgs da commembradi.
- i) La suprapostanza sa excluder commembras che cunterfan als interess dall'uniun.

## Art. 4 Organisaziun

L'uniun ha ils suandonts organs:

- a) la radunonza generala
- b) la suprastonza
- c) il post da revisiun

## Art. 5 La radunonza generala

### 5.1

La radunonza generala ei igl organ suprem dall'uniun. Ella ha liug mintg'onni il november.

La radunonza generala vegn convocada en scret cun tarmetter las tractandas a mintga commembra ni cun publicar las tractandas silmeins duas gadas el fegl official.

La radunonza generala sespleiga sco suonda:

1. *Beinvegni*
2. *Elecziun da duas dumbravuschs*
3. *Approbaziun dil protocol*
4. *Prelecziun ed approbaziun dil rapport annual dalla presidenta*
5. *Prelecziun ed approbaziun dil quen annual e dil rapport da revisiun*
6. *Program da lavur per igl onn niev*
7. *Determinaziun dalla contribuziun annuala*
8. *Elecziun dalla presidenta, dallas commembras dalla suprastonza e dil post da revisiun (mintga treis onns)*
9. *Revisiun dils statuts*
10. *Varia*

### 5.2

- a) La radunonza generala ei competenta da decider, sche 1/5 dallas commembras participeschan.
- b) Elecziuns e votaziuns vegnan per regla fatgas cun maunpli.  
Per fatschentas tenor tractandas vala la maioritad relativa.  
Sch'ei dat pliras candidatas, vegn vuschau cun scrutini.
- c) Ina perioda d'uffeci cuoza mintgamai treis onns (art. 7).
- d) In onn vegnan eligidas la presidenta ed 1-3 commembras dalla suprastonza, il proxim onn 1-3 commembras dalla suprastonza e las commembras dil post da revisiun.
- e) Per che la radunonza sappi votar davart propostas, ston quellas vegnir inoltradas il pli tard 15 dis avon la radunonza.

## Art. 6 Radunonza extraordinaria

Radunonzas extraordinarias san vegnir convocadas da tut temps dalla suprastonza ni sin giavisch dad 1/5 dallas commembras.

## Art. 7 La suprastonza

La suprastonza secumpona sco suonda:

1. presidenta
2. actura
3. cassiera
4. 0-4 assessuras

- a) La suprastonza vegn eligida per ina perioda d'uffeci da treis onns. Ina reelecziun ei pusseivla. Il cuoz digl uffeci duei buca surpassar dudisch onns.
- b) La presidenta meina la radunonza generala e la radunonza extraordinaria, ella convochescha e meina las sesidas da suprastonza e representa l'uniun viers anora.
- c) L'actura fa ils protocols.
- d) La cassiera fa la contabilitad ed actualisescha la gliesta dallas commembras.
- e) Las assessuras sustegnan la suprastonza, nua ch'ei fa basegns.

## Art. 8

Las commembras dalla suprastonza ein deliberadas dalla contribuziun annuala e survegnan ina pauschala da spesas annuala da CHF 100.00.

## Art. 9 Il post da revisiun

Las commembras dil post da revisiun controlleschan ils quens e rapportan a bucca ed en scret per mauns dalla radunonza generala.

## Art. 10 Finanzas

Il mieds finansials dall'Uniun da dunnas Laax secumponan sco suonda:

1. dallas contribuziuns annualas
2. dallas entradas che resultan dallas occurrenz
3. dallas contribuziuns da tiarzs
4. dils tscheins dalla facultad dall'uniun.

Ultra dallas spesas (art. 9) e dil preventiv concediu dalla radunonza generala ha la suprastonza la competenza da decider sur da maximalmein CHF 3'000.00.

## Art. 11 Disposiziuns finalas

Per tut ils cass buca menziunai en quels statuts valan ils status dall'Uniun catolica da dunnas dil Grischun.

## Art. 12

Ina revisiun parziala ni totala dils statuts sa vegnir fatga sin proposta dalla suprastanza ni dad 1/5 dallas commembras. Per quei intent drova ei 2/3 dallas vuschs presentas.

## Art. 13

Sur dall'annullaziun dall'uniun sco sur dil diever dalla facultad dall'uniun sa unicamein la radunonza generala decider, aschinavon che silmeins 2/3 dallas commembras ein presentas.

## Art. 14

Quels statuts ein vegni approvai dalla radunonza generala dils 7 da november 2021. Els entran en vigur cun l'approbaziun dall'Uniun catolica da dunnas dil Grischun. Midada digl artechel 3c ils 5 da november 2023.


Ils statuts ein formulai en romontsch ed en tudestg.

Ils statuts dils 10 da november 1996 ein cunquei aboli.

Laax, ils 21 da november 2023


Per la suprastanza dall'uniun da dunnas

Seraina Cathomen



Presidenta Uniun da Dunnas Laax

Sabrina Camathias



Actuara Uniun da Dunnas Laax